

**Mi, Bosanke/Bosanci i Hercegovke/Hercegovci, građani
Bosne i Hercegovine bez bilo kakvih rasnih, vjerski ili
nacionalnih predrasuda, stojimo čvrsto na stajalištu:**

1. da je Bosna i Hercegovina od sticanja nezavisnosti talac agresivnih nacionalnih politika, koje funkcioniraju samo i jedino na mehanizmu podjela i destrukcije države,
2. da je Dejtonski sporazum iscrpio svoje istorijske mogućnosti i da bez pozitivnih Ustavnih promjena nikada nećemo dosegnuti evropske kriterijume i standarde života, niti postati kandidatom za punopravno članstvo u Euro-atlantskim integracijama.

6. Kongres Liberalno Demokratske Stranke donosi

PROGRAMSKU IZJAVU

Političkim programom **Liberalno Demokratska Stranka želi**

- pokrenuti proces političkih promjena koje trebaju da načine ozbiljan zaokret u razvoju države i društva,
- promovirati liberalno-demokratske vrijednosti kao osnovu uređenja budućih odnosa, te
- na narednim izborima osigurati aktivno učešće u kreiranju političke atmosfere koja će Bosnu i Hercegovinu najzad usmjeriti ka evroskoj orijentaciji.

ZBOG OVOGA:

1. HOĆEMO novi Ustav Bosne i Hercegovine.

Ustav kao najviši zakonski akt države ima obavezu izjednačiti sve njene građane pred zakonima. Dejtonski Ustav BiH to nije, jer je diskriminatorski. Novi Ustav treba u potpunosti eliminirati institucionalizaciju etničkog i vjerskog kao pravnih kategorija, a podržati ih kao pravo građana na svjetonazor po vlastitom izboru. Zbog toga Bosni i Hercegovini treba novi, građanski Ustav, koji će osigurati jednakost građana pred zakonima, sekularni karakter države, te ojačanu Državu jeftine i efikasne administracije i jednostavne strukture. U njoj će nosioci političkog života biti državne i općinske institucije sa mogućnostima regionalnog organizovanja.

2. ŽELIMO afirmirati poduzetništvo kao osnovu daljeg ekonomskog razvoja i povećanja zaposlenosti.

- Afirmacijom poduzetništva kao temeljne strukture nove ekonomske politike,
 - promocijom solidarnosti građana za kupovinu i korištenje domaćih proizvoda i usluga,
 - domaćim, pa stranim investicijama,
 - poreskim olakšicama stimulativnim za ulagače,
- treba obezbijediti početne okolnosti za privredni preobražaj i rast zaposlenosti.

Ekonomski razvoj ćemo zasnivati na principima slobodnog tržišta i razvoja privatnog sektora. Povećanje zaposlenosti smatramo najboljim socijalnim programom. Ekonomski rast ćemo usmjeravati ka pravednijoj raspodjeli bogatstva.

3. UVESTI evropsko obrazovanje.

OBRAZOVANJE je sigurnost i budućnost ove zemlje. Treba ga uskladiti sa evropskim i staviti na čelo naših prioriteta.

Zastarjele obrazovne procese u Bosni i Hercegovini koji počivaju na nevjerovatnom principu aparthejda (razdvajanja po nacionalnoj pripadnosti) treba zamijeniti sistemom evropskog obrazovanja. Moramo se intenzivno uključiti u Evropske okvirne programe za razvoj nauke i inovacija. To je jedini put u kojem mala zemlja može naći svoje mjesto u svjetskom tehnološkom napretku.

4. MORAMO jačati kulturni identitet i svijest o pripadanju državi Bosni i Hercegovini i njenom društvu.

Multikonfesionalni i multinacionalni karakter bosanskohercegovačkog društva nije i ne može biti prepreka njegovog kulturnog jedinstva. Jedinastvena kulturna tradicija nameće svijest o jačanju kulturnog jedinstva kao društvene osnove na kojoj je moguće graditi kulturni identitet bosanskohercegovačkog društva. Hoćemo i moramo graditi to jedinstvo kao zalog stabilnosti ukupnih odnosa u BiH.

5. DRŽAVA – CIVILNO DRUŠTVO – PRIVREDA: sinonim su socijalne sigurnosti.

6. JEDINSTVENA BOSNA I HERCEGOVINA U UJEDINJENOJ EVROPI – to je naš cilj!

Ujedinjenje Bosne i Hercegovine nakon procesa disolucija na svim nivoima je naš zadatak. Nacije i vjere nisu prepreka. One su osnova za jedinstveno, solidarno ujedinjenje na osnovama slobode, ravnopravnosti i građanske jednakosti. To su principi Evropske Unije kojima se Bosna i Hercegovina mora pridružiti.

Liberalno Demokratska Stranka će ove svoje programske ciljeve realizirati u saradnji sa snagama opredjeljenim za izgradnju države na liberalnim i demokratskim principima, bez retrogradnih ideologija sadašnjih stranaka na vlasti.